

30

HADITHE TË SAKTA  
RRETH RAMAZANIT



بِسْمِ اللَّهِ الرَّحْمَنِ الرَّحِيمِ

## HADITHI I PARË

Ibn Omeri (Allahu qoftë i kënaqur me të) tregon se Pejgamberi ﷺ ka thënë:

“Islami ngrihet mbi pesë shtylla:

1. Mbi dëshminë se nuk ka zot tjetër që meriton të adhurohet përveç Allahut dhe se Muhamedi ﷺ është i Dërguari i Tij,
2. Faljen e namazit,
3. Dhënien e zekatit,
4. Kryerjen e haxhit dhe
5. Agjërimin e Ramazanit.”

Sahihu i Buhariut, hadithi nr. 8

## HADITHI I DYTË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Agjëroni kur ta shihni hënën e Ramazanit dhe hani (bëni Bajram) kur ta shihni hënën e Shevalit. Nëse është vranët (dhe nuk e shihni), plotësojeni Shabanin me tridhjetë (ditë).”

Sahihu i Buhariut, hadithi nr. 1909

## HADITHI I TRETË

Ebu Seid Hudriu (Allahu qoftë i kënaqur me të) tregon se e ka dëgjuar Pejgamberin ﷺ duke thënë:

“Atij që agjëron një ditë në rrugën e Allahut, Allahu do t’ia largojë fytyrën nga Zjarri për shtatëdhjetë vjet.”

Sahihu i Buhariut, hadithi nr. 2840

## HADITHI I KATËRT

Ebu Hurejra (Allahu qoftë i kënaqur me të) transmeton se i Dërguari i Allahut ﷺ ka thënë:

“Kur të hyjë muaji Ramazan, hapen portat e qiellit, mbyllen dyert e Xhehenemit dhe prangosen shejtanët.”

Sahihu i Buhariut, hadithi nr. 1899

## HADITHI I PESTË

Ebu Hurejra (Allahu qoftë i kënaqur me të) transmeton se i Dërguari i Allahut ﷺ ka thënë:

**“Atij që agjëron Ramazanin, duke besuar dhe llogaritur në shpërblimin e Allahut, i falen mëkatet e së kaluarës.”**

Sahihu i Buhariut, hadithi nr. 2014

## HADITHI I GJASHTË

Ebu Hurejra (Allahu qoftë i kënaqur me të) transmeton se i Dërguari i Allahut ﷺ ka thënë:

“Agjërimi është mburojë, andaj (agjëruesi) të mos flasë fjalë të ndyta e as të mos sillet me injorancë. Nëse dikush e sulmon ose e shan, le t'i thotë: Unë jam agjërues! - dy herë. Beto hem në Atë, në Dorën e Cilit është shpirti im, se era e gojës së agjëruesit është më e mirë tek Allahu i Madhëruar sesa era e myshkut (parfumit).”

Sahihu i Buhariut, hadithi nr. 1894

## HADITHI I SHTATË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Allahu i Madhëruar ka thënë: Agjërimi është për Mua dhe Unë shpërblej për të.”

Sahihu i Buhariut, hadithi nr. 7492



## HADITHI I TETË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Allahu nuk ka nevojë që dikush ta lërë ushqimin dhe pijen nëse paraprakisht nuk i lë fjalët e rrejshme, të punuarit sipas tyre dhe injorancën.”

Sahihu i Buhariut, hadithi nr. 6057

## HADITHI I NËNTË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Allahu ka thënë: Agjëruesi i ka dy gëzime: gëzohet kur të bëjë iftar dhe gëzohet kur ta takojë Zotin për agjërimin e tij.”

Sahihu i Buhariut, hadithi nr. 1904

## HADITHI I DHJETË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Allahu i Madhëruar ka thënë:  
Agjëruesi e lë epshin, ushqimin dhe  
pijen për Mua. Agjërimi është mburojë  
(nga zjarri i Xhehenemit dhe nga  
mëkatet që dërgojnë në të).”

Sahihu i Buhariut, hadithi nr. 7492

## HADITHI I NJËMBËDHJETË

Enes ibn Maliku (Allahu qoftë i kënaqur me të)  
transmeton se Pejgamberi ﷺ ka thënë:

“Hani syfyr, sepse në syfyr  
ka begati.”

Sahihu i Buhariut, hadithi nr. 1923

## HADITHI I DYMBËDHJETË

Ebu Hurejra (Allahu qoftë i kënaqur me të) transmeton se i Dërguari i Allahut ﷺ ka thënë:

“Atij që falet natën gjatë Ramazanit, duke besuar dhe llogaritur në shpërblimin e Allahut, i falen mëkatet e së kaluarës.”

Sahihu i Buhariut, hadithi nr. 2009

## HADITHI I TREMBËDHJETË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Personi që, gjatë agjërimit, ha nga harresa, le ta plotësojë agjërimin e tij, ngase Allahu ka dashur ta ushqejë dhe t'i japë të pijë.”

Sahihu i Buhariut, hadithi nr. 6669

## HADITHI I KATËRMBËDHJETË

Sehël ibn Sadi (Allahu qoftë i kënaqur me të) transmeton se i Dërguari i Allahut ﷺ ka thënë:

“Njerëzit do të jenë në mirësi për sa kohë që e shpejtojnë iftarin.”

Sahihu i Buhariut, hadithi nr. 1957

## HADITHI I PESËMBËDHJETË

Ibn Abasi (Allahu qoftë i kënaqur me të) ka thënë:

I Dërguari i Allahut ﷺ ka qenë njeriu më bujar, e bujaria e tij arrinte kulmin gjatë Ramazanit, kur e takonte Xhibrilin. E takonte atë çdo natë Ramazani dhe e mësonte Kuranin me të. I Dërguari i Allahut ﷺ, në vepra të mira, ka qenë më bujar sesa era që fryn.

Sahihu i Buhariut, hadithi nr. 6



## HADITHI I GJASHTËMBËDHJETË

Abdullah ibn Omeri (Allahu qoftë i kënaqur me ta) transmeton se Pejgamberi ﷺ ka thënë:

“Bilali e thërret ezanin gjatë natës (para agimit), andaj hani e pini derisa Ibn Umu Mektumi ta thërrasë ezanin (e dytë, për namazin e sabahut).”

Sahihu i Buhariut, hadithi nr. 617

## HADITHI I SHTATËMBËDHJETË

Ibn Abasi (Allahu qoftë i kënaqur me ta) transmeton se Pejgamberi ﷺ ka thënë:

“Umra në Ramazan konsiderohet si haxhi (i kryer) me mua.”

Sahihu i Buhariut, hadithi nr. 1863

## HADITHI I TETËMBËDHJETË

Enes ibn Maliku (Allahu qoftë i kënaqur me të) tregon:

Kur ishim në udhëtim me Pejgamberin ﷺ,  
as agjëruesi nuk e qortonte joagjëruesin,  
as joagjëruesi nuk e qortonte agjëruesin.

Sahihu i Buhariut, hadithi nr. 1947

## HADITHI I NËNTËMBËDHJETË

Enesi (Allahu qoftë i kënaqur me të) tregon:

Zejd ibn Thabiti ka thënë: Hëngrëm syfyr me Pejgamberin ﷺ, pastaj ai u ngrit për namaz. Unë e pyeta:

- Sa ka qenë koha mes ezanit dhe syfyrin?
- Sa t'i lexoje pesëdhjetë ajete, - tha Zejdi.

Sahihu i Buhariut, hadithi nr. 1921

## HADITHI I NJËZETË

Ibn Abasi (Allahu qoftë i kënaqur me ta) tregon:

Pejgamberi ﷺ nuk ka agjëruar asnjë muaj të plotë, përveç Ramazanit.

Sahihu i Buhariut, hadithi nr. 1971

## HADITHI I NJËZETENJËTË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Sa e sa agjërues nuk përfitojnë nga agjërimi i tyre vetëm se urinë dhe etjen, e sa e sa namazfalës nuk përfitojnë nga qëndrimi i tyre (në namaz) vetëm se të mbeturit zgjuar natën (mungesën e gjumit).”

Musnedi i Ahmedit, hadithi nr. 8856

## HADITHI I NJËZETEDYTË

Aishja (Allahu qoftë i kënaqur me të) tregon:

I Dërguari i Allahut ﷺ puthte ndonjëren prej grave të tij duke qenë agjërueshëm.

Sahihu i Buhariut, hadithi nr. 1928

## HADITHI I NJËZETETRETË

Aishja (Allahu qoftë i kënaqur me të) tregon:

Ndonjëherë Pejgamberin ﷺ e zinte sabahu në Ramazan duke qenë xhunub (nga marrëdhëniet intime e) jo nga ëndrrat, pastaj pastrohej dhe agjëronte.

Sahihu i Buhariut, hadithi nr. 1930



## HADITHI I NJËZETEKATËRT

Abdullah ibn Omeri (Allahu qoftë i kënaqur me ta) ka thënë:

I Dërguari i Allahut ﷺ hynte në itikaf në dhjetëshen e fundit të Ramazanit.

Sahihu i Buhariut, hadithi nr. 2025

## HADITHI I NJËZETEPESTË

Aishja (Allahu qoftë i kënaqur me të), gruaja e Pejgamberit ﷺ, ka thënë:

Teksa i Dërguari i Allahut ﷺ ishte në xhami (në itikaf), e fuste kokën në dhomën time dhe unë ia krihja. Gjatë kohës sa ishte në itikaf nuk hynte në shtëpi, përveç për ndonjë nevojë (personale).

Sahihu i Buhariut, hadithi nr. 2029

## HADITHI I NJËZETEGJASHTË

Aishja (Allahu qoftë i kënaqur me të) tregon:

Kur hynte dhjetëshja (e fundit),  
Pejgamberi ﷺ e përmblihte veten,  
e gjallëronte natën (me adhurim)  
dhe e zgjonte familjen e tij.

Sahihu i Buhariut, hadithi nr. 2024

## HADITHI I NJËZETESHTATË

Aishja (Allahu qoftë i kënaqur me të) transmeton se i Dërguari i Allahut ﷺ ka thënë:

“Kërkojeni Natën e Kadrit në netët tek të dhjetëshes së fundit të Ramazanit.”

Sahihu i Buhariut, hadithi nr. 2017

## HADITHI I NJËZETETETË

Ebu Hurejra (Allahu qoftë i kënaqur me të) transmeton se Pejgamberi ﷺ ka thënë:

“Atij që falet Natën e Kadrit, duke besuar dhe llogaritur në shpërblimin e Allahut, i falen mëkatet e së kaluarës.”

Sahihu i Buhariut, hadithi nr. 2014

## HADITHI I NJËZETENËNTË

Ibn Omeri (Allahu qoftë i kënaqur me ta) ka thënë:

Pejgamberi ﷺ e ka obliguar sadakanë e fitrit: një saë me hurma ose elb, për muslimanin, qoftë rob a i lirë, mashkull a femër, i vogël a i madh, si dhe ka urdhëruar që të jepet para se njerëzit të dalin për namaz (të Bajramit).

Sahihu i Buhariut, hadithi nr. 1503

\*Saë - njësi matëse në kohën e Pejgamberit ﷺ  
(1 saë = mbushja e dy shuplakave të duarve katër herë me hurme, djath, rrush të thatë, elb, pasul, oriz etj, e që përfaqësohet i bie 3kg).

## HADITHI I TRIDHJETË

Ebu Ejub Ensariu (Allahu qoftë i kënaqur me të) transmeton se Pejgamberi ﷺ ka thënë:

“Kush e agjëron Ramazanin dhe e pason atë me gjashtë ditë agjërim të muajit Sheval, i llogaritet sikur ta ketë agjëruar një vit (të plotë).”

Sahihu i Muslimit, hadithi nr. 1164

# 30

## HADITHE TË SAKTA RRETH RAMAZANIT

PËRGATITI:  
**BLERIM MURATI**

### REFERENCAT:

1. Muhtesari i Sahihut të Buhariut - Dr. Sad el Shethri
2. Sahihu i Muslimit
3. Musnedi i Ahmed ibn Hanbelit
4. [www.hadithet.com](http://www.hadithet.com)
5. [www.fjale.al](http://www.fjale.al)